

Inuit A-nik akissarsiaqartut 1. januar 2014 aallarnerfigalugu sulinerminnut ilanngaatisiaqalernissaat siunertaralugu Akileraartarnermut inatsisip allanngartinnissaata eqqunnissaanut aningaasalersornissaanullu tunngavissamik nassuiaammik saqqummiusseqqullugit aalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat saqqummiunneqassaaq Inatsisartut 2013-mi upernaakkut ataatsimiinneranni, taamaasilluni aliangiinnermut ilanngaatip eqqunnerata aningaasatigut kingunissai 2014-mut Aningaa-sanut Inatsisissamut atatillugu tullerriaarnermi ilanngunneqarsinnaaniassammata.

(Inatsisartunut ilaasortaq Andreas Uldum)

Akissuteqaat

(Aningaasaqarnermut Naalakkersuisoq)

Aappassaaneerinnineq

Aningaasaqarnermut Akileraartarnermullu Ataatsimiititaliap siunnersuummik peqqissaartumik suliarinninneranut qujaffigerusuppara. Inuit ataasiakkaat suliffissaaleqereerlutik suliffeqalerunik aningaasat atorsinnaasaasa malunnaatilimmik qaffariaateqarnissaasa qulakkeernerisigut inuit amerlanerusut imminut pilersunnginnermit eqeersimaartumik imminnut pilersorsinnaalersinneqarnissaat sulinermut ilanngaatisiaqartitsinissami siunertarineqartoq Ataatsimiititaliap isumaliutissiissummini erseqqissaatigaa.

Tamatumani ineqarnermut, isumaginninnermut akileraartarnermullu inatsisit akornanni ataqtigiiitoqarnerata peqqissaartumik misissoqqissaarneqarnissaa pisariaqassasoq Ataatsimiititaliamit Naalakkersuisut assigalugit erseqqissaatigineqarpoq. Tassunga atatillugu tunngavissamik aalajangersimasunik arlalinnik nassuiaammut ilanngunneqartussamik aammalu ilanngaateqartitsisoqassappat taakku aningaasalersorneqarnissaannut Ataatsimiititaliaq kissaateqarpoq.

Nassuiaatip kissaatigineqartup 2013-imi upernaakkut ataatsimiinnermi agguanneqarnissaanut Naalakkersuisut isumaqataapput, taanna oqaaseqaatinik kissaatigineqartunik imaqaassalluni. Taamaakkaluartoq Naalakkersuisunit maannangaaq erseqqissaatigineqassaaq ineqarnermut, isumaginninnermut akileraartarnermullu inatsisit taakkulu akornanni ataqtigiiitoqarnerata peqqissaartumik misissorneqarnissaannut piffissaliunneqartoq angumerineqarsinnaassanngilaq.

Taamaattumik iluarsartuussinissanut piareersaatinik suliaqartoqassaaq aammalu sulinermut ilanngaatisiat kissaatigineqartut sunniuteqarnissaat anguniarlugu ajornartorsiutit sorliit aaqqiivigineqassanersut qulaajarneqassalluni.

Taama oqaaseqarlunga siunnersuut Inatsisartunut oqaluuserisassanngortippara.